



Justice Facility  
A Bilateral Co-operation  
between the Governments  
of Timor-Leste and  
Australia



## PROGRAMA MONITORIZASAUN SISTEMA JUDISIÁL

Rua setubal Colmera Dili, Timor Leste  
Po Box 275, Telefone: 3323883, [info@jsmp.minihub.org](mailto:info@jsmp.minihub.org)  
[www.jsmp.tl](http://www.jsmp.tl)  
Face book: jsmp.timorleste

***JSMP servisu atu garantia justisa ba ema hotu...!***



Tribunál Distritál Baucau

### **Tribunál Distritál Baucau kontinua hatudu progresu iha kazu inestu**

Iha 18 Setembru 2013 Tribunál Distritál Baucau prizide julgamentu leitura akordaun ba krime inesu no kondena arguidu ba tinan 18 iha prizaun tanba provadu komete violasaun seksuál agravadu hasoru nia oan rasik. Pena ne'e akumulasaun husi krime kontinuada ne'ebé arguidu komete dala tolu hasoru vítima.

Tribunál konklui nia kondensaun ne'e bazeia ba faktu provadu sira ne'ebé tribunál produs liu husi konfisaun arguidu nian, deklarasaun lezada nian, relatóriu mediku.

Ministériu Públiku akuza katak, arguidu prátika violasaun seksuál kontra lezada dalatolu iha 3 Janeiru 2012, no tuir mai iha 3 no 6 Fevereiru 2012 no kauza lezada hetan isin rua. Krime ne'e ho natureza violénsia doméstika no inestu tanba arguidu mak lezada nia aman rasik.

"Pratika inestu ne'e tipu violasaun seksuál ne'ebé grave teb-tebes tanba envolve esplorasun pozisaun autóridade familiár nian no produz konsekuensia multi-asepitu ba vítima nia futuru kuandu la iha prosesu tratamentu no rekuperasaun sustentavel ba vítima," dehan Luis de Oliveira Sampaio, Diretór Ezekutivu JSMP.

"Mesmu haksolok ho progresu iha aspetu kondensasaun ne'ebé tribunál hatun ba arguidu, maibé JSMP kontinau konvida ema hotu nia kontribuisaun atu halo esforsu hotu ne'ebé posivel hodi prevene krime hanesan akontese iha futuru."

Antes ne'e JSMP produz ona relatóriu ida kona-ba prevelensia krime inestu iha Timor Leste no rekomenda ba Governu atu introduz politika lejilativa ida hodi defini kona-ba krime inestu no protesaun ba vítima sira.

Ministériu Públiku akuza arguidu ho artigu 172 kona-ba violasaun no artigu 173 alinea (d) Kódigu Penál kona-ba violasaun seksuál ho agravasaun no artigu 14 kona-ba krime kontinuada. Mesmu nune'e, Ministériu Públiku la konjuga ho provizaun Lei Kontra Violénsia Doméstika mezmú krime ne'e akontese iha situasaun familia nia laran.

Kazu ne'e rejista ho Númeru Prosesu: 35/Crm.C/2013/TDB. Dra. Ângela Faria Belo no Dr. Hugo da Cruz Pui (Juis Estajiadu), mak prezide julgamentu ne'e, Dr. Aderito Tilman representa Ministériu Públiku no arguidu hetan defeza husi Dr. Grigorio de Lima husi Eskritoriu Defensór Públiku.\*\*\*